

Aningaasaqarnermut inatsimmut 2015-imut siunnersuut

(Aningaasaqarnermut Aatsitassanullu Naalakkersuisoq)

Akissuteqaat

(Aningaasaqarnermut Aatsitassanullu Naalakkersuisoq)

Pingajussaaneerneqarnera**Aallaqqaasiut**

Matumuuna Naalakkersuisut sinnerlugit ataatsimiisitaliamut isumaliutissiisut pillugu qujarusuppunga, suliallu naammassineqarnissaanut suleqatigiilluarsimanitsinnut.

Naalakkersuisut anguniagarisimavaat illua-tungiliuttut peqatigalugit aningaasanut inatsimmut amerlanerussuteqarnissaq. Tamanna anguniagaq eqquutsinneqanngilaq. Partiit marluk namminneerlutik qinersimavaat isumaqatigiissutissap atsiorneqarnerani peqataaniaratik naak ataatsimut ataatsimeeqatigiinnerpaalunnik malitseqarsimagaluartoq, siunertaasingaluarlunilu ataatsimoorussamik partiinit tamanit peqataatitaqarnikkut aningaasaqarnermut inatsisissamut isumaqatigiissusiortoqarnissaa.

Qinersineq pissutigalugu piffissassarititaasoq sivikitsoq atorlugu aningaasanut inatsit 2015-imut tunngasoq suliarineqarlunilu akuersissutigineqarpoq. Aqagulu aningaasanut inatsisissaq 2016-imut tunngasoq pimoorullugu suliarineqalissaaq. Tamatuma nassatarissavaa aningaasanut inatsisissap suliarineqarnissaanut qaammatit 1-2 tulliuttut ulapaarfiunissaat tamannalu ukiuni naliginnaasunit sivikinnerusussaassalluni.

Aaqqissuusseqqinnerit

Aningaasanut inatsimmi matumani Naalakkersuisut partiillu tunuliaqutaasut aaqqissuusseqqinnissat suliariniarpaat, tassani innuttaasut amerlanerusut piffissaq ungasinnerusoq eqqarsaatigalugu sulilerseqqinneqarnissaanut suleqataatinneqarnissaat anguniagaassalluni. Siusinaartumik sulisinnaajunnaarnisialinnut aaqqissuusseqqinneq anguniakkat ilagivaat taamaasillunilu aamma isertitakinnerusut aaqqiissuteqarfiginissat siunertaalluni. Aningaasaliissutitigut annikilliliisoqassanngilaq. Aaqqissuusseqqinnissap ajunngitsortarivaa isumaginninnikkut aningaasartuutaasut piffissaq ungasinnerusoq eqqarsaatigalugu akileraartarnikkut isertitassanut saatikkiartuaarnissaat. Pitsaaqutissartai taakku namminneerlutik takkunnavianngillat aatsaallu piffissami ingerlareersumi malugineqarsinnaajumaarlutik. Siusinaartumik soraarnerussutisialinnut aaqqissuussaanerup siunertaa iluatsikkumallugu Naalakkersuisut kommunit suliffissaqartitsinnaasunik pilersitsiniarneranni suliniarneranni kiisalu suliffeqarfinnik nikerartunik suliffiusinnaasunik pilersitsiniarnissamut kiisalu sulileqqissinnaasunik tigooraanikkut periarfissaat nukittorsarniarpaat. Tamanna ataatsimoorussamik akisussaaffiuvoq ukiorpassuarni

oqallisaasimasoq kisiannili ajoraluartumik ataatsimut isigalugu qanoq iliuseqarfigineqarpiarsimanngitsoq. Aningaasanut inatsimmi immikkoortortap anguniarneqarnissaanut aningaasaliisoqarnikuuvoq.

Taamatut aaqqissuusseqqinnissamut suliniuteqarneq naammanngilaq. Aaqqissuusseqqinnissat assigiinngitsorpaaluit pisariaqartinneqarput qulakkeerniarlugu inuiaqatitta isumagilersinnaassallugu ikinnerusut amerlanerusunik pilersuinissaat kiisalu suliffeqarfinnut sinaakkusersuinissaq pitsaanerusoq pilersikkumallugu. Taamaattumik Naalakkersuisut kommunit suleqatigalugit, inuussutissarsiutitigut kiisalu susassareeqatigiinnut allanut attuumassuteqartunut aaqqissuusseqqinnissamut suliniutit nutaassat pitsanngorsassallugit massakkut ukiunilu aggersuni suleqatiginnikkumapput. Tamanna periarfissatut isigineqanngilaq kisiannili pisariaqartinneqartutut isineqarluni, tamannalumi aningaasaqarnermut inatsimmi 2015-imi ersersinneqarpoq kiisalu aamma ukiumi matunami aningaasaqarnermut politikkikkut nalunaarummi aamma ersersinneqarluni.

Pingaarnersiuiunerit

2015-imut Aningaasanut inatsit aaqqissugaanitsinni ajornartorsiutinik aaqqiiniarnitsinni alloriarneruvoq siulleq. Partiit aningaasaqarnermut inatsisip isumaqatigiissuteqarfigineratigut qinersimavaat inuusuttut suliffissaaleqinerat akiorniarlugu pingaarnersiuiinissaq, inissianik aaqqissuusseqqinnissamut aningaasaliinissamut pingaarnersiuiinissaq kiisalu sanaartornermut pilersaarutinik suliaqarnerup nukittorsarnissaa, tassani ilaatigut ilaatinneqarlutik ilinniarfeqarfinnut sanaartornerit kiisalu ilinniagaqartunut inissiassat.

Aningaasaqarnermut inatsit aamma imaqarpoq pisariaqalersimasoq aammaarluni Great Greenland A/S-imut aningaasaleeqqittariaqalernerit, suliffeqarfiup ukiup ingerlanerani aningaasaqarnikkut ingerlatsinerani ajornartorsiornerulernissaa pinaveersaartinniarlugu. Naalakkersuisut pingaartippaat aningaasaqarnikkut tapiissuteqarnissaaq kisimiissanngitsoq. Suliffeqarfiup attanneqarsinnaasumik ingerlatsisisinnaalernissaanut pilersaarummik peqarnissaaq pisariaqarpoq ukiuni tulluittuni aningaasaqarnikkut ineriartornerata pitsaasumik ingerlalnernissaa tassani anguniarneqassalluni.

Taamaaqataanik Nunalerinermut ataatsimiisitaliap isumaliutissiisutaa tunuliaqutaralugu nunalerinermut inuussutissarsiornermut aningaasaleeqqittoqarpoq. Aningaasaliinissarlu sioqqullugu suleriesissamut pilersaarummik ersarittumik suliaqartoqassaaq, ilaatigut nerisassanik pilersuisinnaanermik ineriartortitsisinnaasumik sunniuteqarsinnaasumik, ilaatiigullu qulakkeerinnittussamik inuussutissarsiornerup pitsaasumik aaqqissuussaanerata sapinngisamik nunatta karsianut sunniuteqarpallaarani ineriartornissaa.

Ilisimaneqartutuut ataatsimiinnermi matumani aaliangigassatut siunnersuutaavoq, Inatsisartut Naalakkersuisut peqqussagaat Nunatta Timersortarfissaarsuusaanut suliniarnermut pilersaarummik suliaqarnissaat. Taamaattumik Naalakkersuisut aningaasanut inatsisip pingajussaarneqarnissaanut suliniummut taama ittumut pingaarnersiuinermi aningaasaliissutinik illikartitsipput. Siunnersuutigineqarpoq 1 mio. kr. siunertamut atorneqartussatut ukioq manna immikkoortinneqassasut. Naalakkersuisut

erseqqissaatigerusuppaat, nunatta timersortarfissaarsuassaata sumi inissinneqarnissaa suli aaliangerneqanngimmat, taamatuttaarlu aamma pilersitsinissamat taama ittumut aningaasanik suli immikkoortitsisoqarsimanami. Pilersaarummut tassunga suliat tunngavigineqarumaarput sanaartornissamat pilersaarutit politikikkut naliliiffiginissaannut kiisalu Namminersorlutik Oqartussat, Kommunit susassareeqatigiiffiillu allat isumasioqatigiinnissaannut suliat taakku inerneru aamma atorineqarumaarlutik.

Naggasiut

Aningaasanut inatsit 2015-imi IS-imi angusatigut amigartooruteqarpoq, kisiannili oqimaaqatigiilissalluni ukiut 2015-2018 ingerlanerini. Aningaasanut inatsit isertitassatut sillimmatinik arlalinnik imaqarpoq, taakkulu ukiuni aggersuni aningaasanut inatsisissani inissikkiartuaarneqassapput. Tamannalu sukannererusumik aningaasanik aqutsinermik pisortat ingerlatsinissaannut piunasaqaatitaqassaaq.

Aningaasanut inatsit 2015 naleqqersuutaassaaq Aningaasanut Inatsisissap 2016-ip piareersarneqarneranut, kisiannili pisariaqartinneqarpoq politikikkut aaliangiisoqarnissaaq akisussaassuseqarnissarlu, unammillernartut annertuut anigorniarlugit inuiaqatigiittut maannakkut piffissamilu aggersumi inissisimaffitsinni. Siunertaavoq attanneqarsinnaasumik ineriartortitsinermik pilersitsinissaaq, pisortani attanneqarsinnaasumik aningaasaqarneq kiisalu namminersortuni suliffissanik naleqquttunik sinaakkusersuinerit ineriartortitsinissarlu pilersikkumallugit, tamannalu aatsaat anguneqarsinnaavoq piffissaaq sivisujaaq atorlugu nammaqatigiinnermi. Ukiuni aggersuni aaliangigassat imaannaanngitsut takkuttarumaarput. Aaqqissuusseqqinnissat pisariaqartittuassavagut, pingaarnersiunerit imaannaanngitsut kiisalu aningaasaliissutaajumaartussat isumatusaartut illersorneqarsinnaasullu.

Ilanngullugu matumuuna pitsaasumik siunertalersugaasumillu politikikkut aningaasanut inatsimmut siunnersuutip 2015-imut tunngasup isumaqatigiinniutigineqarneranut atatillugu partiit sulillaarsimanerannut qutsavigerusuppakka.